

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 5.7.2012 18.05 Uhr auf 94.0 bzw. 87,7

Leev Toehörers,

bevor ik toe Kickers Emden koom, noch 'n paar Woorden toe de Europameisterskupp. Lesd Dönnerdag hett Düütskland ja tegen Italien mit 0:2 verloren. Dat hett all düütske Foetballfans leep seer doen. Un ik bün ehrelk, ik hebb mi düchtig argert, as ik dat in de Kiekkast sehn hebb. Na mien Menen hett uns Bundestrainer Jogi Löw 'n heel groot Fehler maakt, as he Podolski, Gomez un Kroos upstellt hett. Podolski kreg up de linke Kant keen Steek, Gomez kunn nix maken, kreg van buten keen Flanken un Kroos wuss wall gaar neet wor he lopen sull, um de Spölmaker van Italien, Piero, uttoeskalten. Ik verstah neet, dat Jogi Löw dat neet al na 'n Vördelstünn murken hett. Do harr he wesseln musst un neet erst na de Paus. Worum he aber Kroos drin laten hett, dat blifft wall sien Geheemnis. Villicht was dat ok beter, dat wi tegen Italien in de Halvfinale al verloren hebben. Tegen de Spaniers harren wi wall ok keen Kans hat. Un dann was de Trüriegheit in Düütskland - un ok bi mi - seker noch groter west. Aber insgesamt könt wi mit dat Ofsnieden van uns düütske Nationalmannskupp in Polen und Ukraine toefree wesen. Hopen wi nu maal, dat dat bi de Weltmeisterskupp in Brasilien 2014 noch beter word.

Man nu toe Kickers Emden. As ik güstern kört na Klock fiev mit mien Auto up de Parkplatz vör de THW-Huus fahren bün, stunnen dor blot ruugweg 10 Autos. Dat word neet völ, doch ik bi mi. Wor sünd de Fans, hebb ik mi fraagt? An de Beerbuud truff ik dann de Mannlü van Kickers Emden, de upstünns dat Seggen hebben. Se meenten, dat man vandaag mit minn Toekiekers rekend harr. Saterdag tegen Groningen würr dat völ beter utsehn. Hopen wi dat maal.

Dat Spöl van Kickers tegen de 2. Mannskupp van de VFL Wolfsburg gung 0:0 ut. Dormit harr ik nu gaar neet rekend, spölen de Wolfsburgers doch in de Regionalliga. Man de Mannskupp van Kickers Emden hett heel goed spölt un mithollen. Van 'n Twee-Klassenunnersched was nix toe sehn. Dat spreckt för de jung Kickersmannskupp. Un dorum kunn Kickerstrainer Yasin Turan mit sien Mannskupp ok best toefree wesen – un de ruugweg 200 Toekiekers ok. Torkansen wurren in dat Spöl so goed as neet rutspölt. De Torwarten müssen keen hart Skoet hollen. Of un toe bi Flanken kunnen se sük bewiesen. Dorbi moken de Emder Torlü **Carstens** un **Buss**, de in de 2. Halvtieg kwamm, 'n heel seker Indruck.

Bernd Grotelüschen kreg in de 1. Halvtied as eentigster Spitze bold keen Ball. In de 2. Halvtied settete de Trainer hum dann in de Veererkett in. Un dor mook he sien Saak heel bestens.

In de 70. Menüte ennelk maal 'n groot Kans vör Kickers, as de Portugies **Carlos Santos da Luz** 'n Freetrapp ut goed 20 Meter knapp tegen dat Tor settete. Dat was dat dann ok.

Dorna passerte neet mehr völ. De 19 Kickersspöler, de insett wurren, un de Fans freiten sük, as de Emder **Jan Lammers** as Schiri, he hett insgesamt goed fleit, dat Spöl offleite, dat se 0:0 spölt harren.

Saterdagnamiddag kummt mit Groningen aber 'n anner Kaliber in 't Oostfreeslandstadion. Maal sehn, wo sük de Kickersmannskupp dann sleit. Ik hoop dat minnestens 1000 Toekiekers sük dat Spöl ansehn. Kickers kann dat Intreegeld goed bruken. Also leev Foetballfans, koomt Saterdag na Emden un kiekt joe dat Spöl Kickers Emden tegen FC Groningen um Klock 6 in Emden an.

So, nu as alltied, noch 'n Foetballwitz.

Wat maakt 'n Hollander, wenn he bi de Europameisterskupp 'n Spöl wunnen hett:

He maakt de Playstation ut.

So, dat was dat weer maal för disse Week,

ik hoop, Joe hett dat Plattdütsk gefallen, denn mien Motto heet ja alltied,

plattdütsk dürt - netto as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.